

**Bosna i Hercegovina
Federacija Bosne i Hercegovine
Tuzlanski kanton
Grad Tuzla**



**Služba za ekonomski razvoj, poduzetništvo
i poljoprivredu**

Na osnovu člana 5. Odluke o kriterijima i načinu raspodjele finansijskih sredstava iz Budžeta Grada Tuzle sa pozicije „Transfer za rad neprofitnih organizacija u oblasti poduzetništva”, akt Gradonačelnika, broj: 02/11-A-1323-2026, od 30.1.2026. godine (“Službeni glasnik Grada Tuzle”, broj 2/26), a u vezi sa Programom utroška sredstava iz Budžeta Grada Tuzle za 2026. godinu sa pozicije „Transfer za rad neprofitnih organizacija u oblasti poduzetništva”, akt Službe za ekonomski razvoj, poduzetništvo i poljoprivredu, broj: 04-11-1512/26, od 3.2.2026. godine, Služba za ekonomski razvoj, poduzetništvo i poljoprivredu Grada Tuzle, dana **16.2.2026. godine**, objavljuje:

**JAVNI POZIV
za dodjelu sredstava iz Budžeta Grada Tuzle za 2026. godinu, za podršku
rada neprofitnih organizacija u oblasti poduzetništva, sa pozicije „Transfer za rad neprofitnih
organizacija u oblasti poduzetništva”**

I - Predmet Javnog poziva

Predmet ovog Javnog poziva je dodjela sredstava iz Budžeta Grada Tuzle za 2026. godinu, za rad neprofitnih organizacija u oblasti poduzetništva planiranih na poziciji: „Transfer za rad neprofitnih organizacija u oblasti poduzetništva”, ekonomski kod 04001/614311/82.

Dodjela sredstava se vrši u skladu sa Odlukom o kriterijima i načinu raspodjele finansijskih sredstava iz Budžeta Grada Tuzle sa pozicije „Transfer za rad neprofitnih organizacija u oblasti poduzetništva”, akt Gradonačelnika, broj: 02/11-A-1323-2026, od 30.1.2026. godine (“Službeni glasnik Grada Tuzle”, broj 2/26), (u daljem tekstu: Odluka).

II - Prioritetna oblast za finansiranje

Grad Tuzla, putem Službe za ekonomski razvoj, poduzetništvo i poljoprivredu, poziva neprofitne organizacije sa sjedištem na području grada Tuzle da kandiduju svoje programe rada sačinjene ciljano za kandidovanje za dodjelu sredstava iz ovog Javnog poziva, tako da su programske aktivnosti koje kandiduju za dodjelu sredstava iz ovog Javnog poziva u 2026. godini usmjerene na ostvarenje razvojnih ciljeva grada Tuzle, da ih realizuju samostalno i/ili u saradnji sa Gradom Tuzlom, da ih realizuju na području grada Tuzle i van područja grada Tuzle u kojem slučaju se aktivnosti trebaju odnositi na promociju razvojnih potencijala Grada Tuzle, promociju privrednih subjekata sa područja grada Tuzle, te u svemu trebaju biti u skladu sa općim ciljevima predviđenim Programom utroška sredstava iz Budžeta Grada Tuzle za 2026. godinu sa pozicije „Transfer za rad neprofitnih organizacija u oblasti poduzetništva”, bliže navedenim u Smjernicama za aplikante u okviru ovog Javnog poziva i koje se nalaze u prilogu ovog Javnog poziva.

Sredstvima koja se dodjeljuju putem ovog Javnog poziva podržat će se programske aktivnosti neprofitnih organizacija u oblasti poduzetništva u 2026. godini, kao jednoj od prioriteta oblasti prema Strategiji razvoja grada Tuzle do 2026. godine.

III – Iznos sredstava za dodjelu putem ovog Javnog poziva:

Za dodjelu sredstava putem ovog Javnog poziva u Budžetu Grada Tuzle za 2026. godinu planirana su sredstva na poziciji: „Transfer za rad neprofitnih organizacija u oblasti poduzetništva”, ekonomski kod 04001/614311/82, u iznosu od 126.000,00 KM.

Zainteresirane neprofitne organizacije dužne su sufinansirati kandidovani program rada ili iz vlastitih sredstava ili sredstava osiguranih od drugih donatora.

Aplikanti su u prijavi na ovaj Javni poziv dužni navesti ukupnu vrijednost programa rada sačinjenog ciljano za kandidovanje za dodjelu sredstava iz ovog Javnog poziva, kao i iznos sredstava koji se traži od Grada Tuzle.

Iz sredstava transfera za rad koja se dodjeljuju u okviru ovog Javnog poziva mogu se finansirati troškovi tekućeg poslovanja organizacija koji su nastali u godini u kojoj se dodjeljuju sredstva, a koji su određeni u članu 4. stav 2. i 3. Odluke o kriterijima i načinu raspodjele finansijskih sredstava iz Budžeta Grada Tuzle sa pozicije „Transfer za rad neprofitnih organizacija u oblasti poduzetništva”, akt Gradonačelnika, broj: 02/11-A-1323-2026, od 30.1.2026. godine (“Službeni glasnik Grada Tuzle”, broj 2/26), a navedeni su u Smjernicama za aplikante u okviru ovog Javnog poziva, koje se nalaze u prilogu ovog Javnog poziva. Neprihvatljivi su za pravdanje troškovi koji su ranije plaćeni iz drugih izvora sredstava.

Grad Tuzla zadržava pravo da ne dodijeli sva raspoloživa finansijska sredstva koja su predmet ovog Javnog poziva ukoliko po Javnom pozivu ne bude zaprimljen dovoljan broj prijava koje zadovoljavaju kriterije utvrđene predmetnom Odlukom o kriterijima i načinu raspodjele finansijskih sredstava iz Budžeta Grada Tuzle sa pozicije „Transfer za rad neprofitnih organizacija u oblasti poduzetništva”, na osnovu koje se objavljuje ovaj Javni poziv.

IV - Aplikanti koji imaju pravo na podnošenje prijave:

Učešće u raspoređivanju sredstava putem ovog Javnog poziva za podršku svojih programa rada, bliže određenih u odjeljku III, stav 3. ovog Javnog poziva, mogu ostvariti neprofitne organizacije koje ispunjavaju sljedeće kriterije i uslove utvrđene predmetnom Odlukom o kriterijima i načinu raspodjele finansijskih sredstava iz Budžeta Grada Tuzle sa pozicije „Transfer za rad neprofitnih organizacija u oblasti poduzetništva”:

- koje imaju sjedište na području grada Tuzle i djeluju u statusu: udruženja i razvojnih agencija prema kojima Grad Tuzla ima osnivačka ili suosnivačka prava i obaveze i koji samostalno kao i u partnerstvu sa Gradom Tuzlom realizuju projekte u oblasti lokalnog ekonomskog razvoja na području grada Tuzle, uz podršku iz međunarodnih i domaćih fondova i organizacija (u daljem tekstu: aplikanti),
- koje imaju sjedište na području grada Tuzle i djeluju u statusu udruženja obrtnika i privrednih komora čije osnivanje je regulisano posebnim zakonima i koje djeluju kao asocijacije u koje su interesno učlanjeni isključivo privredni subjekti (obrtnici i privatna preduzeća) i čiji su programi rada isključivo usmjereni na unapređenje privrednog razvoja, razvoja sektora obrtništva, malih i srednjih preduzeća u privatnoj svojini (u daljem tekstu: aplikanti),
- aplikanti iz prethodna dva stava, za programske aktivnosti koje realizuju na području grada Tuzle i van područja grada Tuzle a koje su isključivo u funkciji promocije razvojnih potencijala i postignuća Grada Tuzle u oblasti lokalnog ekonomskog razvoja, za aktivnosti na zajedničkoj realizaciji projekata u funkciji lokalnog ekonomskog razvoja na području grada Tuzle, te aktivnosti u cilju promocije, razvoja i zastupanja interesa privrednih subjekata sa područja grada Tuzle,
- aplikanti koji registrovanu djelatnost odnosno aktivnosti na dostizanju ciljeva radi kojih su osnovani obavljaju najmanje 20 godina, te
- koji posjeduju odgovarajuće materijalno-tehničke i kadrovske pretpostavke, kao i prethodno iskustvo u radu i djelovanju u oblasti unapređenja privrednog razvoja i sektora poduzetništva.

Neće se uzeti u razmatranje prijave aplikanta:

- čiji se rad i programske aktivnosti odnose na isključivu dobit pojedinca,

- koji obavljaju aktivnosti usmjerene na političke i vjerske ciljeve,
- koji nisu izvršili svoje obaveze u vezi sa ranije dodijeljenim sredstvima iz Budžeta Grada Tuzle,
- za koje se utvrdi da namjena utroška sredstava za koja je podnesena prijava na ovaj Javni poziv nije utvrđena u skladu sa članom 4. stav 2. i 3. predmetne Odluke o kriterijima i načinu raspodjele finansijskih sredstava iz Budžeta Grada Tuzle sa pozicije „Transfer za rad neprofitnih organizacija u oblasti poduzetništva”. Prihvatljivi troškovi navedeni su u Smjernicama za aplikante u okviru ovog Javnog poziva. Smjernice su u prilogu teksta ovog Javnog poziva.

V – Uputstvo za prijavu na Javni poziv

Zainteresirane neprofitne organizacije detaljne informacije o uslovima za apliciranje, kriterijima za dodjelu sredstava, dokumentaciji koja se predaje uz prijavu na Javni poziv, prihvatljivim i neprihvatljivim troškovima, minimalnoj i maksimalnoj visini sredstava koja se dodjeljuje, nazivu tijela za ocjenjivanje prijava, rokovima i načinu objavljivanja rezultata provedenog javnog poziva, te propisanim obrascima koji se predaju uz prijavu, mogu pogledati u Smjernicama za aplikante u okviru ovog Javnog poziva i iste su u prilogu teksta ovog Javnog poziva.

VI - Prijavna dokumentacija

Ispunjena prijava sa neophodnom dokumentacijom dostavlja se u zatvorenoj koverti u jednom štampanom primjerku, lično putem protokola u Centru za pružanje usluga građanima (Šalter sala) Grada Tuzle ili poštom preporučeno.

Prijava treba sadržavati sljedeće dokumente:

- a) prijavni obrazac, sa programom rada bliže određenim u odjeljku III, stav 3. ovog Javnog poziva,
- b) pregled budžeta,
- c) administrativne podatke o aplikantu,
- d) finansijsku identifikacionu formu,
- e) popunjenu i potpisanu izjavu o podobnosti,
- f) popunjen obrazac liste za provjeru.

Dodatna dokumentacija koju treba dostaviti kako bi prijava mogla biti vrednovana i ocijenjena, obuhvata sljedeće:

- a) - rješenje o registraciji za aplikanta (original ili ovjerena fotokopija rješenja),
- kopija izvoda iz službenog glasila u kojem je objavljen zakon kojim je propisana obaveza osnivanja privredne komore (odnosi se na aplikante koji su u statusu privredne komore)
- b) identifikacioni broj (fotokopija),
- c) fotokopija lične karte ili uvjerenja o državljanstvu za odgovornu osobu upisanu u sudski registar ili u odluku skupštine o imenovanju,
- d) kratak opis realizovanih aktivnosti u prethodnoj godini, u oblasti obuhvaćenoj ovim Javnim pozivom,
- e) uvjerenje nadležne Porezne uprave o izmirenim obavezama prema javnim prihodima (original ili ovjerena fotokopija, ne starije od 30 dana od dana objave Javnog poziva),
- f) završni godišnji finansijski izvještaj za prethodnu godinu (bilans stanja i izvještaj o prihodima i rashodima), (fotokopija), **koji će dostaviti odabrani aplikanti u roku od osam dana od isteka zakonskog roka za predaju godišnjeg finansijskog obračuna Finansijsko-informatičkoj agenciji (FIA), za prethodnu godinu,**
- g) podaci o stručnosti osoba koje će biti angažovane na programu (kraći CV),
- h) zvanični dokument/potvrda banke o transakcijskom računu aplikanta (fotokopija).

VII - Preuzimanje dokumentacije, način prijavljivanja, mjesto i rok za dostavu prijave na Javni poziv

Set obrazaca za prijavu na ovaj Javni poziv može se preuzeti na zvaničnoj internet stranici Grada Tuzle (www.grad.tuzla.ba), a nalaze se u prilogu teksta Javnog poziva.

Dokumentacija se može preuzeti za vrijeme dok je otvoren Javni poziv.

Prijave se dostavljaju u jednom štampanom primjerku, u zatvorenoj koverti ličnom predajom u Centar za pružanje usluga građanima (Šalter sala) u zgradi Gradske uprave, radnim danima (ponedjeljak–petak), u periodu od 8,00 do 15,30 sati, ili se predaju preporučenom poštom, na adresu:

GRAD TUZLA
Služba za ekonomski razvoj, poduzetništvo i poljoprivredu
Ul. ZAVNOBiH-a broj 11,
75 000 Tuzla

sa naznakom:

„Prijava na Javni poziv za dodjelu finansijskih sredstava neprofitnim organizacijama iz Budžeta Grada Tuzle za 2026. godinu, sa budžetske pozicije:
„Transfer za rad neprofitnih organizacija u oblasti poduzetništva”,
-Ne otvarati prije zvaničnog otvaranja- „

Javni poziv ostaje otvoren 15 dana od dana objavljivanja, a krajnji rok za predaju aplikacija je 3.3.2026. godine. Aplikacije koje budu pristigle poslije navedenog roka bit će razmatrane jedino u slučaju da poštanski žig ukazuje na datum slanja prije zvaničnog isteka roka. Aplikacije poslane na bilo koji drugi način (npr. faksom ili e-mailom) neće biti uzete u razmatranje. Vanjska strana koverta mora sadržavati naziv javnog poziva na koji se aplicira, puno ime i adresu aplikanta i naznaku “Ne otvarati prije zvaničnog otvaranja“.

U slučaju da su potrebne dodatne informacije i pojašnjenja, potencijalni aplikanti mogu kontaktirati Službu za ekonomski razvoj, poduzetništvo i poljoprivredu, putem telefona broj: 035/307-385 i 307-387, ili slanjem upita putem e-mail-a: dijanad@tuzla.ba sa naznakom: „Javni poziv“, najkasnije do pet dana prije zatvaranja javnog poziva. Odgovori na upite će biti dostavljeni u elektronskoj formi najkasnije u roku od tri radna dana od prijema upita.

Služba za ekonomski razvoj, poduzetništvo i poljoprivredu